

## Dithero tsa Tirelano mo Kutlwanong

Thero ka Sontaga wa 14 morago ga moletlo wa Borarobongwe, e le ka 25. 09. 2011

48/2011

### Mo leineng la Modimo o e leng Rara le Morwa le Mowa o o Boitshepo!

1. Sefela sa 187 - 173/180
2. **Thapelo:** Rara wa rona yo o kwa legodimong, o re abele Mowa o o Boitshepo wa gago gore o re rute go rapela, le go go ikanya. Ke se re se kopang ka Jesu Keresete, Morwao. Amen.
3. Epistolo ka fa thulaganyong ya 2 e kwadilwe mo go Baroma 8:12-17;  
Efangele ka fa thulaganyong ya 1 e kwadilwe mo go Luka 17:11-19.

4. A go ipolelwe tumelo ya bokeresete! 5. Sefela
6. Thapelo ya mmadi wa thero. 7. Lefoko

Mareko 1:40-45, le re: “Jaanong ga tla molwetse wa lepero kwa go ene, a mo rapela, a mo khubamela, a mo raya, a re: ‘Fa o rata, o ka mphepafatsa.’ Jesu a tlhomoga pelo, a ntsha letsogo, a mo ama, a mo raya, a re: ‘Ke a rata, phepafala!’ Lepero la akofa la mo tlogela, a fola. Mme Jesu a mo laela thata, a akofa a mo rebola, a mo raya, a re: ‘Itise gore o se ka wa bolelela ope sepe! Mme tsamaya o ipontshe moperesiti, o be o ntshetse phepafalo ya gago tse Moše o di laotseng, go nna tshupo mo go bone.’ Mme ene ya re a tswa, a simolola go bolela tse dintsi, le go utlwatsa tiro eo, mo Jesu a neng a sa tlhole a kgona go tsena mo motseng a bonwa, mme a nna kwa ntle mo mafelong a a senya. Mme batho ba tla go ene, ba tswa ntlheng tsotlhe.” Amen.

**8. Thero:** Barategi mo Moeneng wa rona Jesu Keresete, ke lona Lefoko la thero ya kajeno. Re utlwa ka lona, fa moefangeli Mareko a bua ka ga motho wa lepero yo o kileng a tla mo go Jesu, a mo kopa gore a mo phefatsa mo bolwetseng jo, jo bo boitshegang, jo bo bokete. Ka fa molaong wa Bajuda motho wa bolwetse joo o ne a sa dumelelwe go nna fa gare ga batho. Jwa boifisa mo go kalo, gonne bo tshelana mo go maswe. Molao wa re: A ba nne ka fa ntle go motse gore fa motho a atamela, ba kue, ba re: Re itshekologile! Re itshekologile! (Lev. 13:45-46). Baratwa ba Morena, ke gona re utlwang gore motho mongwe yo o neng a lwala ka bolwetsi jo bo maswe, le jo bo boitshegang joo, a atamela mo go Jesu, a mo kopa, a re: Fa o rata, o ka mphepafatsa. Baratwa, mafoko a motho yoo a supa tumelo ya gagwe.

Motho yoo ga a kope gore Jesu a mo thuse. O a mmolelela gore o na le thata go mo phepafatsa. Ga tlhaga mo go ene fela gore fa Jesu a rata go dira jalo, go mo phepafatsa mo leperong la gagwe, o tla kgona go dira. Jesu a mo utlwela botlhoko, a thusa motho wa lepero, a dira ka fa kopong ya gagwe. Ke gore ka Lefoko le le lengwe re a utlwa gore o ne a mo phepafatsa motho yoo. Ka go thusa molwetse Jesu o a supa gore o na le thata go thusa le mo bolwetseng jo bo boitshegang jo bo ntseng jalo. Modimo, jaaka o tlhodile tsotlhe ka Lefoko la ona, fela jalo Jesu ka Lefoko le le lengwe fela o kgona go fodisa, le go phepafatsa. Tiro ya ga Jesu e supa gape, e a re gopotsa ka Lefokoo le le reng: “Gonne o buile, mme ga direga; a laola, ga ba ga nna teng,” Pes. 33:9.

Ee, phuthago, Morena yo wa rona, e bong Jesu, le mo go rona, fa re atamela mo go ene ka tumelo, le ka go ikanya, Lefoko la gagwe mo nakong e re tshelang mo go yona kajeno go ka diragala tsotlhe mo go ene, fa re dumela, re mo ikanya. Fela batho ba bantsi ba setse ba latlhile boikanyo mo malwetseng a a ntseng jalo kajeno. Ba bua tse dintsi, mme ke se le sengwe fela se re ka se dirang, e bong go atamela mo go Jesu, re bue jaaka motho yotlhe, re re: Morena, fa o rata, o ka re phepafatsa. Re a utlwa, gape re a bona gore Jesu o utlwetse motho yoo botlhoko. Fela jalo o ka re utlwela botlhoko kajeno, fa re tshwenngwa ke malwetse. Phuthago, ga re itse gore tumelo e gorogile jang

mo pelong ya motho yole, gonne bolwetse jole bo ne bo sa alafege, Go ka bo go diragetse gore bo mo fetse fela, mme go se na ope yo o ka bong a kgona go mo alafa, mme motlaledwi yole o ne a dumela gore o ka atamela mo go Jesu, a dumela gore Jesu o na le thata e e fetang thata ya batho ba bangwe. Mme mo go rona kajeno ke molato, fa re baya tsholofelo yotlhe ya rona mo batho.

Phuthego, re a utlwa gore Jesu o ne a ithaganela go thusa motho yoo, a mo laela gore a didimale, a se ka a bolelela motho ka ga phodiso ya gagwe, a mo roma gore a itshupe mo baperesiting, a ntshe dikabelo tse di tlhomilweng. Re a utlwa gore motho yoo o ne a sa didimale, a godisa tlotlo ya ga Jesu, a bua le batho ka ga se se mo diragaletseng, Efangele e re: Mme ene ya re a tswa, a simolola go bolela tse dintsi, le go utlwatsa tiro eo, mo Jsu a neng a sa tlhole a kgona go tsena mo motseng a bonwa, mme a nna kwa ntle mo mafelong a a senya. Mme batho ba tla go ene, ba tswa ntlheng tsotlhe.

Phuthego, go makatsa se se diragalang mo go rona mo nakong e re tshelang mo go sona. Dingaka, le ba mereo ba batla tlotlo le go go bonagala mo makgotleng, ba a rata gore batho ba tsee tlotlo yotlhe ya bone, ba e bee mo mafifing a bone, ba a itlotla, ba re: Ke bona ba ba alafang bolwetse jo bo rileng. Mme tota ba bua maaka, gonne ba ipatlela kgalaletso mo bathong. Ke ka ntlha ya moo, fa batho ba le bantsi ba sa tlhole ba dumela mo go Jesu, ba tsaya boikanyo jwa bone, ba bo baya mo dingakeng, le mo ga ba mereo le ditaola. Ka moo, phuthego, re kaela ka Lefoko la kajeno gore re itshwenye ka tumelo ya rona, re itsoseletse jaaka motho yole yo o neng a dumela mo go Jesu. Le rona, barategi mo Moreneng, re bue jaaka motho yole, re re: Fa Morena Jesu a rata, o ka re phepafatsa. Tsotlhe di diragala mo Jesu fela, fa motho a dumela mo go ene, gongwe fa boikanyo bo mo go Jesu. Phuthego, ga go a tshwanela gore re solofele mo go tse dingwe, gongwe re dumele mo go tsona, gongwe re di ikanye.

Kajeno re rutiwa ka ga tumelo ya motho yoo yo o neng a sa belaele ka thuso ya ga Jesu. O ne a tla mo go Jesu, a mo khubamela ka mangwele, a kopa Jesu gore a mo phepafatse mo bolwetseng jo bo boitshegang, jo bo mo thibetseng go kopana le ba bangwe. Le mo go wena go ka diragala kajeno, fa tumelo ya gago e tlhomama mo go Jesu, o ka phepafadiwa ke ene. Ke sona se a se dirang mo selalelong sa gagwe kwa re amogelang boitshwarelo jwa maleo gore re phepafadiwe mo go tsotlhe tse di bosula. A go diragale le mo go rona se se solofeditsweng ka Lefoko la Mophepafatsi wa rona. Ke gore kgakgamatso ya ga Jesu ke go tiisa ka Lefoko la gagwe le mo phuthegong ya gagwe le le reng: Go gorogile yo o nang le thata ya go phepafatsa ba ba kgotlegileng go fenywa bolwetse ka go ikanya Jesu, e seng ope yo mongwe.

Mo bofelong, phuthego, re tiisa le rona gore re ka tshwana le motho yole, re tsee ditsholofelo tsotlhe tsa rona, re di bee mo go Jesu, re se solofele sepe se sengwe, re itse gore Jesu o teng, ke yo o re phepafatseng mo maleong otlhe, gore le rona re nnele ruri mo go ene ka nako yotlhe, re nne re tshele ka go ipolela gore: Fa wena, Jesu, o rata, o ka re phepafatsa. Amen.

**9. Thapelo:** Rara, o re rute go baya boikanyo jotlhe jwa rona mo go wena, re tle re itse gore ga go thuse sepe go ikanya tse dingwe, re itse gore re tshwanetse go khubama fa pele ga gago, re rapele, re re: Rara, re kopa tse re di kopang mo leineng la ga Jesu Keresete, Mopholosi wa rona. Amen.

Thapelo ya Morena: Rara wa rona yo o mo legodimong ...

10. Sefela sa 216 - 201/209

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke J. A. Nkosi, ka ngwaga wa 2011  
Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.